

Esekiyellarini kuku

Yuwaa kirak Esekiyellarini yandarangu anoo pakich kamanchintspa

¿Chakaja anoo yandarang?

Esekiyellarini nee kiraka yandarangiya. Ichtaru, Esekiyellarini Irusarinash taarangiya. Anush apanllpan taarangu, Apanllish pang' ksutarangiya. Babiloniyshuchsha urkar kuseeru, wamarisha Irusarinshuchee kasirangu, Irusarinshuchee urkar tipstirpa zapan Babiloniyap machtarangiya. Esekiyellarineetstam machtarangiya. Babiloniyash taarangu, Apanllsha Esekiyellarinee ipusarangiya waama kuk kamanimaama.

¿Chakaama yandarang?

Esekiyellarini Apanlllee kuk kamanimaam kizpur yasarangiya. Waanpatatin Utaáchichpatatin Babiloniyash waneerangiya. Itaru, Irusarinshuchee waneerangitamta. Utaáchchee tputsi mangoo zapan p'tseerangu, Sambaytarintspa, tárangu, tputssha Irusarinaa nda mbizaranganaya.

¿Mayaamaja yandarang?

Esekiyellarini tsiyatsis tsimbun kamanirangiya. Wandari Irusarinash taarangu, Papcha, Apanll waneerunts. Nee yakat Apanll izuuru kapeetchiya, tárangiya. Ashirucha, zapishsha Babiloniyshuch tputs Irusarinaa izuuru kapeetarangsin, tputssha, Paja. ¿Waninll zurampatari kamaniranguwa? Ashiri Esekiyellarinee kukoo mazinayani, táranganaya. Anumunsha, Esekiyellarinsha, Sambaytarintspa. Apanll iyaa Utaáchcheetsini zapshinaa yusur iyaanpee tsapunni zanganchiya, tárangiya. Táyaru, tputsee mang' p'tseerangiya.

¿Mayaatseeja kamanik?

Na yuwaa kamanku anoo kamanchintspa.

Kapitoto 1—3: Apanll Esekiyellarinee, Siy nuwaa kuki kamaningcha, tárangiya.

Kapitoto 4—24: Apanll ateeja: Nuw yaktaa Irusarina zurampatari kapeetchima, watam siy yutaritshishireetsis kasamaam nda zandaksawa, tárangiya.

Kapitoto 25—32: Apanll ateeja: Nuw zurampatari arapchee urkar tiptsirpatari kizpur wanichima, tárangiya.

Kapitoto 33—39: Apanll zurampatari átcha: Nuw Israelchichee yutaritshishirineetsi kapeetkachuri, anoo mbizakchuri, yusur watsapunish wayachima, tárangiya.

Kapitoto 40—48: Apanll zapshinaa Irusarinaa yusur wanasir wayaru, waanaatstam pang' kizpur wanasireetstam panguchiya,

tárangiya.

Nuw Esekiyeli yuwaa Apanll kamanirangu anoo kamanchintspa

**Apanll Esekiyelaa kamanimapanem
kamachtarangiya
Pamazookpazi ashiruri Apanll
watsirar parangina**

1 ¹⁻³ Nuw Esekiyeltana Apanlllee kuk kamanimapani, Busi wipa. Minush zar nuw Babiloniyash kungumun wingu

Kebaramun Apanlllee parangina. Washunand ichinguruni anush putamanandani apusap tsap puzap taarangiya. Yuw Israelchichee kurak Jowakimarini putayarusin, arap apusap tsap machtarangana, an zameetpa masach tushiychu, zarsha zameetpatash, tsupsha ipunpunaru, anush kanind tawatarangu,^a Apanlllee

^a 1.1-3 Apanll wanichu anu 19.11 tsiyatsis nipta tatsamooru taaritamta.

pamazukpazi ashiruri parangina. Anush zar Apanllsha nuwamun uwee wayayaru, tuwizpurtangiya.

⁴Amb ashirangu, yap zar puwachingarattu ambeem kambusur kizpur kambustarangu, psassha yakarangitamta. Sumassha watsam kurakurtaru patarich, misha mamar tamatarparee ashiru mamartarangiya. Ashirangu, annungirisha kizpur kuraa ashirangu, kachich ksimunamaam waritarangiya. Ipusanandsha sumas ashiru tuwasineeru, kurakurtaru, maachi ngusamb chumbee-pimash ksaneeyaruch tamatarparee ashiru parangina. ⁵Anushsha ipusanand tputs ashtamaru ipunpunar parangitamta. ⁶Ansha tputs ashiru minamtashuri nutsas ipunpunar tash taaru parangina. Itaru, wazitpungachsha ipunpunartam taarangitamta. ⁷Upazsha, misha wanumbitam waj itsinsaru zúkikiru, wanshirsha wakar karupan waxizup ashiru kurakurtaru tuwasineerangiya. Maachi ngusamb kizpur wanasir kapasirumchichtaru kurakurtar ashtaru ashirangiya. ⁸⁻⁹Ansha ipunpunar tshiz, misha wach ipunpunartam, misha wazitpungach ipunpunartam taaru, ansha tputsich ashtamaru taarangiya. Ansha wazitpungach yuwaptartatam tassaruru anpatari kandanirangiya. Naamaam zandkachu, yapiri tassaruru ambiri naarangiya. ¹⁰Yuwsha tash ipunpunar taarangu, ambiritam tassaruru, tputsich tashich tamaparee ashtamarangiya. Uputsitsinungichsha tash tumuz ashtamarangiya. Mbazinungichsha tash wakar toro tamaparee ashtamaru taarangiya. Anumunsha, ushipsha yungan^b ashtamaru taarangiya. ¹¹Pursha wazitpungach iwar itsiruru izandaruru taarangiya. Anshitisin tsimbunari wazitpungachpatatin kandanirangitamta. Minpasha wazitpungach tsimbunatam waanaatsi irpungarangiya. ¹²Washunandari wanandari tsinisaru

naanatarara ashirangiya. Nda kanapku, yapiri tassaruru ambiri naarangiya. Yapiri tsinisaru Apanll wizpur kamachtarangu ambiri naarangiya. ¹³Anshacha, yuw tputs ashtamaru kinarangu, ansha sumas watsam ashtamaru, misha maachi tuzaz^c sunleerutaru patarich ashirangiya. Naanatarara, piyamsha naanatarara, ipusanand ashishtaru ashirangiya. Sumas tamaparee ashiru kurakurtaru anushsha shitungarangitamta. Mamarsha kizpur mamartarangiya. ¹⁴Yuw tputs ashiru anshat naanat, kanapta, yusur naanat, tsípata ashirangiya. Mamar ashiru ansha tsípata ashirangitamta.

¹⁵Nap ashiranguri, tputsinungiri tsa-push wanungeetari pshiyrrshish iripich parangina. ¹⁶Ashpari ipunpunari iripich waanandari tatsamooru, wayarutaru, kurakurtaru, tuwasineerangiya. Wich patumbich wanasirimash tamatarparee ashirangiya. Pshiyrrshish tamaparee ashtamaru, anush wachush washunand tapamta tapamta ashiru, wanasireew parangina. ¹⁷Anpasha mikeeru purangamaam waritarangiya. An yuw ipunpunar taaru anpata wapitam kanapta ashishamaam nda waritarangiya. ¹⁸Mishat, nap ashkuri, parangitamana, yuw ipunpunaru iripich anich tamatarparee ashiru, kapung iripich torreezaru kurakurtaru, annungirisha tuwasineerangu,^d isping tamaparee ashirangiya. ¹⁹Ansha Apanllsha wan tputs ashiru, mikeeru naakchu, uwma kárkachu, iripichsha naarangitamta. Ansha chiyzata ashkachu, uwsha chiyzata, naata ashkitamta. ²⁰Apanllsha tputs ashtamaru, yapiri waana kamachtakuru, wizpur Apanll tuyamzakachuru, iripichsha washunandari tatsamooru naaktamta. Watam minamari waanandari washunand tapatstakpaz ashiru nuw parangina. ²¹Tputssha chiyzata, naanatarara ashkachu, uwsha iripich chiyzata, naanatarara ashkitamta. Tputs ashiru an

^b 1.10 Apanll wanichu anu 4.7 tsiyatsis nipta tatsamooru taaritamta.

^c 1.13 Apanll wanichu anu 4.5 tsiyatsis nipta tatsamooru taaritamta.

^d 1.18 Apanll wanichu anu 4.8 tsiyatsis nipta tatsamooru taaritamta.

zanaykachu, uwsha zanayta ashkitamta. Wandaya tputs Apanll wani chiyya-yaru, naakchu, uwsha washunandarit naata ashkitamta. Watatam iripchimash washunandari tapatstarangiya.

²² Muchumunsha iwaz ispingu^e ashiru kurakurtaru, wiriwirtaru, taarangiya.

²³ Tsapushoomsha tputs ashiru waanpatatin wazitpungachpatartin kandaninir ashirangiya. Tsimbunartisin waanaatsi irpungapaz ashiranganaya. ²⁴ Mishat, zunganeerangu, kitsishi mazinaringitamana. Wazindpungachsha íwar itsirataraa, naanataraa ashkachu, kung tawangur kumbiykchu,^f amtarparee ashiru zunganeerangiya. Itaru, an waana Apanll kizpureeru, wizpur zunganeeku tárangiya. Sundar marchaku, zapan zunganeeku amtarparee ashirangiya. Nuw anoo mazinarangina. Itaru, wanuts xiyykamchu, wazitpungachsha yaruwawataraa, zanayta ashirangiya. ²⁵ Shitungeeshinu, kapung zunganeerangiya. Yuwamun ispingu ashiru kurakurtaru, anumun iwaz yusarangiya, yuwashtam much itsiparu anshutam zunganeerangitamta.

²⁶ Muchimun iwaz wanasir ispingu ashtamaru wayarangu anumun iwaz Apanll uxinash ashiru parangina. Anushsha patumbich wanasirimish kawamban kizpur mbamash parangina. Anushsha uxinashish tputs ashiru^g kuxinarangiya. ²⁷ Yuw tputs ashiru parangi, ansha waturtumand káru íwar kizpur kurakurtar ksimunamaam waritarangiya. Ngusamb chumbeepimash ashiru kawapshitaru anamunsha taturpiru, sumas ashiru kurakurtar ashirangiya. Waturta tsapushoomsha sumas ashiritam kinarangu, waanaatsim ashchiri tuwasineerangiya. ²⁸ Tsung sinash tamatarparee ashiru tureezaru íwar kanindap Apanll nuwaa waanaatsi wizpur tuyamandarangiya.

Anootssha paranguri, nuwsha timuchta, tsapumun muchi tuw ashirangina.

Na kamaneena yuwaa pamazukpazi ashiruri Apanll watsirar parangi anootsi.

Apanll nuwaa Esekiyela ipusarangiya

2 ¹ Anumunsha, nuw k'kuzee mazinarangina. Nuwaa tárangiya; Shiy Esekiyelaa, nutsish musásimashtaati,^a chiyyangi. Nuw shiyapa tsiyatpi, atina tárangu.

² Apanll nuwaa tsiyatku, zunganeekchinandari, anush wizpur nuwash pshturangu, nuwaa ichiyyataraa ashirangiya. Ashkachinandari, k'kuzee zunganeekchu, kitsiptarti mazinarangina.

³ Aranginasha k'kuz tsiyatku tárangiya. Shiy Esekiyelaa, nutsish musásimashtaati, ashiritaa shiyash na tsiyatsis zanganchima. Shiysha Israelchichpatatis nuwaa kuki kamaningcha, yuw tputs nuwaa ngatarangusin, wits nda mazinarangana anootsi. Anchichtam zitaminarini nuwaa ngatarangitamsinaya. Na in zari wandaritam nlluranursha ashiritam ngatkusin taakanaya. ⁴ Wipshitisin ashiritam yutaritaw, mangshartawana. Chínash mangoonamaam mbama. Ashirucha, shiyaa zanganimaam zandkina. Shiysha nuwaa kuki kamaningcha; Ambtanda siyaa Apanll átu, tángcha nuwaa kuki. ⁵ Amb átush, mazinamana mazinachpasinaya. Witsi nduntaatiya, kaapa mazinaksinaya. Itaru, an tputs Israelchich yutaritawsincha. Itaru, anush mangush chinachpasinaya; Nish iyash Apanll kuk kamanipan taarparee, táchpasinaya.

⁶ Shiy Esekiyelaa, nutsish musásimashtaati, ashiritaa mangish punirustarinllpa. Mishat, yuwaa mantsir tsiyatkana, anoo punirinllpa. Wandtaatiya punikush, kpapapaz taturpiru, misha ztunll-

^e 1.22 Apanll wanichu anu 4.6 tsiyatsis nipta tatsamooru taaritamta.

^f 1.24 Apanll wanichu anu 1.15; 19.6 tsiyatsis nipta tatsamooru taaritamta.

^g 1.26 Apanll wanichu anu 4.2-3 tsiyatsis nipta tatsamooru taaritamta.

^a 2.1 Matiwa 8.20 tsiyatsis nipta tatsamooru taaritamta.

paz shiyamun matarutaru ashipaz ashirtaati, anoo punirinllpa. Shiyaa mantsir tsiyatkitaateesinaya, misha shiyanung tsiyanuspa tash napkitaateesinaya, yuwamand nda wits mazinakana anumand punirinllpa. ⁷Shiysha mapiyrush nuwaa kuki tsiyatangcha. Yuw mazinamaam zandkana an mazinachinllinaya. Mishat, nduntaatiya mazinamaam zandkusin, waani ashtachinllinaya. Watam uwim mang' yutaritsincha; nda k'kuzee wits mazinakanaya. ⁸Yuwaa nuw kamachtaki anoo payungcha. Shiynaa mangsheerinllpa. Uwin tamakpasinaya shirinllpa. Natu kukish xipungangee. Yuw nuw shiyaam panayanlllee anoo ktungangee, tárangiya.

⁹Tárangu, uw paxayeeru, nuwanungi uwish minam kirak yandam turpiru payu ashirangiya. ¹⁰Anootsha kirakaa ipursarangu, yandam ashchiri minungichich kirak yandam, arangichsha tash yandamatam ashiru, mangooz mantsashish, waneeshish tanumaam tsiyatsis yandam taarangiya.^b

3 ¹Ashiriya, nuwaa tárangiya. Shiy Esekiyelaa, nutsish musásimashtaati, ashiritaa nee yandam tsiyatssee ktungangi. Sheerush, Israelchichee tputs tsiyatashincha, tárangiya.

²Tárangu, nuw kuki xipungaranguri, uwsha nuwaaam tsiyatssee yandama tapshurangiya. ³Sheeru, Na pishayarush, tzazangee, tárangu, nuwsha, Ayu aturi, katungarangina. Káchakuri, kindur wakungur ashiru kam kácharangina.^a

⁴Ashiranguri, nuwaatssha tárangiya. Israelchichip tputs napashini. Nuwaa kuki kamanishincha. ⁵Yap tputs k'kuzee mbam tsiyatkana amb, nda nuw shiyaa zangankina. Itaru, saanpatatis Israelchichpatatis kamanimaam zanganchima. ⁶Nuw nda shiyaa piyam tsapurunas yap tputs zapan taarusin, min k'kuz tsiyatksin, nda anoo kuk shiy mangoonamaam waninda. Amb nda shiyaa zangankina.

Itaru, ashiritaa arapichsha tputs shiyaa kukish mazinachpasinaya. ⁷Itaru, Israelchichinaa tputs shiyaa kukish mazinamaam ngatchinllinaya. Watam nuwaa kuki payumaam nda zandkanawa.

Ashpari Israelchich tputs mang' ndunareewcha. Nda tputs mangurir tamatarparee ashiranaya. ⁸Itaru, na nuwsha shiyaa kamachtakchuri, shiyaatssha tumangshartakpaz sheerunll, shiysha mangish mbampaz ashirush, waantin tamapsinaya ashiritam kasachinllpa. ⁹Nuw shiyaa mbammash ashiru maachi patumbich tamatarparee ashtachinllpa. Shiysha anoo tputs punirinllpa. Waantaatiya tputs tsiyanuspa shiyaa napkusin, nda zandkusin, anoo punirinllpa, tárangiya.

¹⁰Anumunsha, nuwaa tárangitamta. Kaapa mazinangcha. Zurampatarta yuw shiyaa kamachtakchi, anoo mangiptish mazinangcha. ¹¹Amb sheerush, yap Israelchich tputs arap pseertambarangana amb naayarush, napashincha. Wandtaatiya mazinamaam nda zandkusin, Waana Apanll nuwaa atuwa, tángcha, nuwaa tárangiya.

¹²Apanllsha nuwaa tuwizpurtarangu, tuchiyzarangiya. Sheeru, Taarashipan kizpur wanasirimash, Naamachima, táyananllu, kushinungshiti kizpur zunganeerangu, mundaz tamaparee ashiru mazinarangina. ¹³Yuw zunganitaru, an wazitpungach tputs pur ashiru, anush yusarangiya. Waanpatatin kitatsingarangusin, yusarangiya. Iripichpa washunand yusarangana. Mundaz amtarparee ashiru zunganeerangiya. ¹⁴Apanllsha wizpurpa nuwaa tuchiyzarangu, nuwaa upwa itsirarangu, arapiri minup tsap wayarangiya. Naayaranlluri, tsyantakuri, kapung mangi mantsarangina. ¹⁵Yuwash Israelchich tashitungam taarangana, annung yakat Tel-abib, kungumun Kebaramun wing nuw kusarangina. Anushsha Israelchichpa taar ashirangiya. Tsimbun kuwiz matayaru

^b 2.10 Apanll wanichu anu 5.1 tsiyatsis nipta tatsamooru taaritamta.

^a 3.3 Apanll wanichu anu 10.9-11 tsiyatsis nipta tatsamooru taaritamta

maats nguti taaranguri, ¿Amcheezi? tárangina.

Ashiriya, kamaneena yuwaa Apanll nuwaa Esekiyelaatsi kamachtarangu anootsi.

Apanll nuwaa Esekiyelaatsi wanimpanee wayarangiya

¹⁶ Tsimbun kuwiz matayaru maats kachingaranllu, Apanllsha nuwaa yusur tsiyatku tárangiya. ¹⁷Shiy Esekiyelaa, nutsish musásimashtaati, ashiritaa nuw shiyaa tputsee wanimpanee wayayana, sundar tsangampan ashirush Israelchichee tputs ksutamaama. Nuwsha shiyaa tsiyat-kachuri, shiysha nuwaa kuki kamanimantar shingcha. Amb ashkush, uwshtisin nuwaa kuki intsinsaru mazinachinllinaya. ¹⁸Wandaya nuw, Nee tputsee yutaritshisimand tsipatspatari wanichima, aturi, itaru shiysha nda anoo tputs mangoo p'tseekush, yutaritshishee nda kasaku, uru waanamandari yutaritshishirini tsipachinllinaya. Ashkatssin, nuwsha shiyaa yutaritam ínachtamparina, watam nda waneerangshawa. ¹⁹Shiy yutaritamapanee tputs mangoo p'tseektaatish, itaru nda mangoonkusin, waanamandari yutaritshishirini tsipachinllinaya. Itaru, shiyana tsiptasee kamungachpasha. ²⁰Wandaya tputs wanasirimash piyari chinakchusin, yutaritshish pshtukchusin, uru tsipachinllinaya. Watam sirú wanasir taarangana anoo ndusha chinakuri mapiyachtinawa. Ashkatssin, waanamandari yutaritshishirini tsipachinllinaya. Itaru, shiysha anoo tputs nda mangoo p'tseerangush, waanamandari tumshiri tsiparangana anumand nuwsha shiyaatstam yutaritam íchinllpa, watam nda waneerangshawa. ²¹Shiy nda yutaritshishush pantsamaam mangoo p'tseekush, uwsha mazinakchusin, mangush wanasir chinakchusin, tsipachazinllinaja. Watam k'kuzee payuranganawa. Ashkachu, shiysha tsipatsee kamungchitamsha, Apanll nuwaa tárangiya.

Ashiriya, kamaneena yuwaa Apanll nuwaa wanimpanee wayarangu anootsi.

Esekiyel kuk makuksheerangiya

²² Apanll nuwamun uwi putayaru tsiyatarangiya. Chiyzayarush naangee. Tsap paramashtaru anush nuw shiyaa tsiyat-chinllpa, tárangiya. ²³Nuwsha chiyzaranguri, yapiri waana tárangu ambiritam shitungeeranlluri naatarangina. Watand-sash nuw Apanll wanasirimshirini yusur parangina. Síru parangi ashiritam kungumun Kebaramun wing paranguri, timuchta, tsapumun tuw charipti ashirangina. ²⁴Itaru, Apanllsha wizpur nuwash pshturangu, nuwaatssha tuchiyzarangiya. Tsiyatku tárangiya, Pangipish kanapungcha. Anush pangishish pshtuyarush shtandayarush ksangcha. ²⁵Papcha. Tputs shiyaa wanumpa kamuriruch. Ashkatssin, shiysha ndusha shitungamaam waritakush, yaktashuchpa tputs nduntam ipunachsha. ²⁶Amb ashkatssin, nuwsha shiyaa k'keetsish mbam tapats-tachima. Ashkachuri, kukish tsiyatamaam mbamatachsha. Ndusha kukish tsiyatamaam waritachsha. Nduntam tputs kizpur yutaritawaa wanimaam waritachsha. Muxareemsha kinachsha. ²⁷Itaru, nuwaana zandkachuri, yuwash ashkachi, anush yusur shiyaa tutsiyachtachinllpa. Ashkachuri, shiysha yusur tsiyachtachsha. Shiysha tputsee, Apanll nuwaa amb tárangiya, táchsha. Wandaya tputs mazinamaam wits zandku, mazinachinllinpa. Itaru, nduniya mazinamaam zandkusin, mazinamaam nda waritachinllinaya. Watam uwin tputs yutaritanawa; mangshartawanawa, Apanll nuwaa tárangiya.

Ashiriya, kamaneena yuwaa nuw kuki makuksheerangi anootsi.

Chaanaatsi ksutamaam kamankiya

18 ¹Apanll nuwaa kamachtaku, tárangiya. ²Israelschuchish tsiyatsis uru taariya. Wapar wachin kapzee katungkachu, wipsha wanas kapzimshin chtay ashchiya, atanaya. ¿Mayaamsha Israelchich anoo tsiyatsis tayus tayus ashkanaya? ³Nuw Taarashpaneeruri

siyaa atina. Nuwaanamuni suri zuram-patari atina. Ayamtaati siysa anoo yusur tsiyatcheezis. ⁴Yuw tputs yutaritshishiee chinakana, anootsiri waneekchuri, tsipachinllinaya. ¿Antaati nuw wapari-mand yutaritshishiri wipaa wanicheezi? nda. Nuw tputsee ichingaru amuyakina. Ashirucha, itsinsaru natstayaruri, amuyaatsiri waneekina.

⁵Tputs wanasirimash taarash watacha wanasir taatarasha. ⁶An tputs apanllputsip machip íwar kárkachu, anush nda apanllputseem shambatshisheem pshtukiya. Mishat, nduntam ngichzimun apanllputsimun Israelchichimun mang' tatkya. Mishat, nduntam wamkuree wizanll itutskitamta. Ashiritam, wizanll yuwash kurasee mantsaru anush nda ipunkiya. ⁷Mishat, minamtiyam tputsee nda kiyung yachakiya. Wandtaati tputseem urkirpa istarangu, Arangiri suwatpa, átu, maachiritaa púnlluree yarangu, anoo yusur kachizpazsha púnlluree tuwanpukiya. Mishat, minamtiyam nda tputsee maachiri shuchikiya. Tputsee nayaniku, mariz kayatku anoom katungtsee istakiya. Yuwaatssha tputs zapeeku anoomtam wamareem panakiya. ⁸Urkirpa tputseem istaku, nda anumand, Arangeem tuwapangandama, atiya. Mishat, tputs waanpatatin tsiyatssee yaramaam zandkusin, ichingaru mazinayaru, itsinsaru yasayaru, yuwaatsiri yutarit tsiyatarangu anootsiri waneeku, tputsee wanasirimsheetssha kis napkiya. ⁹Yuw nuwaana kamachtarangi anoo tatsamaru, wanasir waanaatsi yámandaku, taarash wanasiriri taaku, kamachtamareetsi payuku, an tputs zurumarpararicha tsinsa. An urutamari taarartatchiya. Nuwsha Apanlleeruri anumashiee tputs kis napchima, Apanll tárangiya.

¹⁰Itaru, insha tputs wip tayutaritama-pan pachampan xarashee wayampaniri taaku, ¹¹itaru waparsha anumashiee nda chinarangu, wipamarisha mantsir

taaku, apanllputsip machip íwar kárkachu, anush apanllputsish shambatshishush pshtuku, kis apanllputseem tinarana anumun mang' tatku, misha wamkureetstaa wizanll itutseeru yamaku, ¹²tputsee pukiri kiyung yachaku, misha tputseetssha maachiree shuchikitam, misha urkiree tputseem istaku, anumand maachiritaa yaku, itaru ayamtaa anoo nda tuwanpuku, ashiritam apanllputsimun mang' tatku, ngichzimunari apanllputsimun yuwaa nuw kizpur tsiyantakuri, ksimun musáki, anoo kis chinaku, ¹³tputseem kurikee nayanikina, mangu átu, itaru yusursha tamundaku, arangitamanasha kurikirish tuwanpungandama táta, táta ashku, anumash tputs zapan masach taacheeja. Ichinguru ashpari yuw mantsir ashkana anoo, nuw kizpur tsiyantakina. Nuwsha waneekchuri, izuuru watstamamari watsipunpatari pastachiya. Waanamand yutaritshishirini tsipachiya.

¹⁴Mishat, apaz wapar yutaritshishush tachitku, itaru wipsha nda mantsirimshee chinaku, ¹⁵misha apanllputsip machip íwar kárkachu, anush nda apanllputseem shambatshisheem pshtuku, misha nduntam ngichzimun apanllputsimun Israelchichimun mang' tatku, misha nduntam tputsee wamkuree wizanll itutsku, ¹⁶nduntam minamtiyam tputsee kiyung yachaku, misha nda tamundaku, yuwaa kachiz tushiykchu anush maachiritaa yusur tuwanpuku, misha nduntam minamtiyam tputsee maachiri shuchiku, yuw tputs mariz kayatku anoom katungtsee istaku, yuw tputs zapeeku anoom wamareem panaku, ¹⁷nda tputsee natsaku, mantsir tayutaritku, urkirpa tputsee istaku, ndusha, Arangeem tuwapangandama, átu, misha tputs waanpatatin tsiyatssee yaramaam zandkusin, ichingaru mazinayaru, itsinsaru yasayaru, yuwaatsiri yutarit taarangu anootsiri waneeku, wanasirimsheetssha tputs kis napku, misha

^a 18.7 Matiwa 25.35-40 tsiyatsis nipta tatsamooru taaritamta.

nuwaanaa kamachtarangi anoosiritam tatsamku, wanasir waanaatsi yámandaku, an tputs waparimand yutaritshishirini nda tsipachiya. Itaru, zurampatari kis taachiya.

¹⁸Itaru, waparsha mantsir taarangu, misha tputsee maachirita shuchirangitam, tputspatatin mantsirimash ashirangu; waanamandari yutaritshishirini waneeshimun tsipachparee.

¹⁹Siy saanpatataa tsiyatkus, táchpasa, ¿Tamashtaja nda waparimand yutaritshishirini, wipsha nda tsipamaam waritak tuwapamaama? táchpasa. Itaru, nuwsha siyaa atina. Watam wipsha nda mantsir yutaritshishee patataranguwa. Tputspatatin wanasir chinaringiya. K'kuzee tuminurangingiya. Nuwaa kamachtamari kapung mangoonaringiya. Ashirucha, amb ashirangu, zurumpatari kis taachiya. ²⁰Yuwamarisha mantsir tputs ashkana anumari tsipachinllinaya. Wipatam waparimand tumshir tuwapamaam pinasa, misha waparitam wipamand tumshir tuwapamaam pinasa. Tputs wanasirimash wanasirimsheetsimaritam taarash yachiya. Yutaritshishpansha tputs mantsirimsheetsiritam waneeshish pshtuchiya, Apanll tárangiya.

Ashiriya, na kamaneena yuwaa chaanaatsi ksutchich anootsi.

Apanll, Yutaritshishee kasakchus, ndusha siyaa wanichintspa, tárangiya

²¹Apanll tárangiya; Yutaritshishpan tputs mantsirimshee kasakchinaareesinaya, nuwaatsha kuki payukchusin, wanasirsha taakchusin, tputsee wanasir tatsamooru chinakchusin, zurampatari an tputs tsipachazinllinaja. ²²Nuwsha yuwaa mantsir ashirangana anoo yusur ayamtaati chinacheezi. Yuwamand wanasirsha taakchinllina, anumand kisshaparee taachinllinaya. ²³Tputs mantsirimash msangaru tsipamaam nuw nda zandkina. Itaru, nuw tínatana; Taárashee mantsirimshee kasayarusin,

wanasirsha taapana átana,^b nuw Apanlli zurampatari atina.

²⁴Itaru, tputs wanasirimshee kasayarusin, mantsirimshishsha yusur pshtukchusin, yuwash tputs mantsirimish ashkana, anush ¿antaati an tputs arangiri taacheeja? nda. Ichtarima wanasir nuwash tachitarangsin, itaru anumunsha nuwaa kasakchusin, nuw anoo pakchiyam nayanikuri, tácheezi, ndambaree. Yutaritshishingaz chinarangusin, nuwaa kasaranganaya. Ashirucha, waanamandari chayarini waneekchuri, tsipachinllinaya, Apanll tárangiya. ²⁵Itaru, siy nuwaa; Apanll mangu tputsee waneekiya, táchpasa. Itaru, mazinangints, Israelchichis. Siy; ¿Mayaamsa anoo chinakus, nuwaa yutaritam ínaksa? Saantari sáricheeru mantsir chinaksa. Watam siy mantsir taarashetsis yámandaksawa.

²⁶Tputs taarashish wanasirimshee kasayaru, mantsirimshishsha pshtukchu, tputsee nda tatsamooru chinaku, tsipatshaparee, yuwamand mantsir patatku anumandarita. ²⁷Itaru, tputs yutaritshishee izuuru kasayaru, wanasirsha taakchu, kamungachshaparee. ²⁸Waanaatsi mangoos p'tseeku, Xam; ¿nuw tamakuri ashkina? átu, ichingaru mantsir ashku anoo kapeetkachu, zurampatari an tputs zapan masach kis taachiya, atina; waneeshshee ndusha taachachiya.

²⁹Itaru, siy Israelchichis nuwaa; Apanll mangu tputsee waneekiya, átpasa. Siy; ¿Mayaamsa anoo chinakus, nuwaa yutaritam ínaksa? Saantari sáricheeru mantsir chinaksa. Nda itsinsaru mangoonaksa.

³⁰Nuw siyaa minamtawaatsiritis natstayaruri, Israelchicheetsis yuwamand mantsir ashirangins, anumand wanichintspa.^c Nuw Apanlleeruri atina; Nda ashishtamaam yutaritshisheetsis ksangints, zurampatari atina. ³¹Yuw ichinguru yutaritshishee mantsir patatarangis anoo ksangtsa. Nuw ashkis anoo nda kis naparangina. Ksimun musárangina. Mangooz kaneesichsha

^b 18.23 2 Pitoru 3.9 tsiyatsis nipta tatsamooru taaritamta. ^c 18.30 Matiwa 16.27; Romshucheema 2.6 tsiyatsis nipta tatsamooru taaritamta.

chinangints, watam ndunnaa ashkus, Israelchichis uru tsipatsawa. ³² Nuw tina; Siyaa nda waani tsipapana, atina. Yutaritshishireetsis ksangtsa. Ashkachus, kis taachpasa, nuw Apanlli zurampatari atina, Apanll tárangiya.^d

Ashiriya, kamaneena yuwaa Apanll, Yutaritshishee kasakchus, ndusha siyaa wanichintspa, tárangu anootsi.

Zurampatari nuwaa kuki Israelchichee kamaningcha, Apanll nuwaa tárangiya

33 ¹ Apanll Taarashipan nuwaa tárangiya. ² Shiy Esekiyelaa, nutsish musásimashtaati, ashiritaa shiy saanpatatis tsiyatashincha. Amb tángcha; Nuw yaktashchee wanimaam undararee zangankachuri, yaktashuchsha minam sundar tsangampaneem wayachinllinaya. ³ Ansha sundar ksutamapan undarar kayumatanu anoo pakchu, uwsha kukunkachu, tputsee, Papcha, kundararini naanllpa, táchiya. ⁴ Wandaya tputs anoo mapiyksin, nda wits mazinaksin, undararsha kuskachu, pachakchu, waanamandari chayarini tsipachinllinaya. ⁵ Watam mazarangitaatssin, itaru ndusha k'kuzee payuranganawa. Wanaree wits mazarangusin, tsipatsee kamungchinaapsinaya.

⁶ Itaru, sundarsha ksutamapan undararee pakeertaa, itaru uwsha tputs nda mangoonamaam puu puu átu, undararsha kuseeru, tputsee minamtaati pachakchu, nuwsha ksutamapanee, Na, nishuri shiy tsipanlltampasha, watam tputsee nda nayanirangush, puu puu táranghawa, táchima.

⁷ Ashiriya, nuw siyaa Esekiyelaatsis atina. Shiy Esekiyelaa, nutsish musásimashtaati, ashiritaa nuw shiyaa tsangampaneempaz ashiru wayarangina. Israelchichee tputs ksutkush, sundar tamatarparee shingcha. Shiy nuwaa kuki payungcha. Yuwaa aship kamaneenlli anoo kamanimantar shingcha. ⁸ Wanari nuw, Tputs

mantsirimshee tsipatspatari wanichima, atinaareena, itaru shiysha nda anoo tsiyatkish, yutaritshishee kasamaam nda mangoo p'tseerangush, an tputs yutaritshishimandarit tsipachpasinaya. Itaru, nuwsha shiyaa, Na, nishuri tsipanlltamcha, watam tputsee nda nayanirangush, nda waneeranghawa, táchparina. ⁹ Itaru, shiy wanasir chinakush, tputsee istarangi-taatis, yutaritshishpanee tputs, Ksangtsa; yutaritshishee kpitangtsa, tárangitaa-tish, itaru uwshtisin nda ayu tárangusin, uru waanamuntari tumshiri tsipachpachinllinaya. Itaru, shiyana sitarunasee pangachsha, Apanll nuwaa tárangiya.

Ashiriya, kamaneena yuwaa Apanll, Zurampatari nuwaa kuki kamaningcha Israelchicheetsi, tárangu anootsi.

Apanll chiyaa tputseetsich taarashich yasakiya

¹⁰ Shiy Esekiyelaa, nutsish musásimashtaati, ashiritaa Israelchichee tputs tsiyatashincha. Ashiriya, tángcha. Siy átsa; Yutaritshishee zapan pataranguni, anumand kizpur kiyung kachiykiniya. Ashirucha, ngutini tsipatsiptar ashkiniya. Ashiriya, ¿tamayareezich wanasir taaychich? átscha siya. ¹¹ Nuw Taarashipaneeruri nuwaanamuni suri zurampatari atina. Yutaritshishpaneetsaatiya tputs nuw, Waani tsipap, ateezi, nda. Itaru, waani yutaritshishirineetsi kasayarusin, nuwashsha tachitap, Israelchicheetsis atina. Ashkachus, uru wanasirsha taatssa. Ashiriya, Israelchichis mazinangtsa. Yutaritshishireetsis ksangtsa. ¿Mayaam tsipatsee zandaksa? Apanll Israelchichee tárangiya.

¹² Shiy Esekiyelaa, nutsish musásimashtaati, ashiritaa saanpata tputsee tsiyatashincha. Tputs wanasirimshish tachitarangsin, itaru yutaritshishushsha pantsakchusin, yuw sirútama wanasir taarangaana, anumand waanaatsi tapachindamaam wanindaja. Mishat, tputs yutaritshishpan mantsirimshee kasakchinaareesinaya,

^d 18.32 2 Pitoru 3.9 tsiyatsis nipta tatsamooru taaritamta. ^a 33.11 2 Pitoru 3.9 tsiyatsis nipta tatsamooru taaritamta.

yuwamand sirútama yutaritshishee mantsir patatarangana, anumand nda tsipachinllinaya. Mishat, tputs wanasirimshishtaatiya tachitarangsin, itaru yutaritshishushsha pantsakchusin, yuw sirútama wanasir taarangana, an ¿taá-rasheem istacheeja? nda. ¹³Nuw tputs wanasirimshee, Siyaam kis taamaam panachintspa, aturi, itaru uwsha yuwaa áti anoo mapiyksin, yusursha mantsirish pantsakchusin, anoo tputs ndusha kis napchima, atina. Anumashee tputs tsipatspatari wanichima. ¹⁴Nuw tputsee mantsirimshee, Nuw siyaa wanichintspa, tákchuri, itaru uwsha yusur taarshee wanasir yámandakchusin, ¹⁵yuw chirikoo iripungashee yarangana anoo, nduntaati ashiru shuchirangana anoo tuwanpukchusin, misha nuwaa kamachtamari izuuru tuminkatssin, tputsee wanasir tatsamooru chinakchusin, mantsirimshee taarashish izuuru kapeetkatssin, zurampatari zapan masach taachinllinaya. Waneeshshee ndusha wayachina. Watam nuw kamachtamari taarashipaniwa. ¹⁶Waanari tputs wanasirimshee chinakchusin, tputs patatin wanasirsha tatsamooru chinakchusin, wanasirshaparee taachinllinaya. Nuwsha yuwaa sirú mantsir taarangana anoo ndushapari chinachina.

¹⁷Shiyashuch Israelshuch tputs táchinllinaya. Apanll mangu tputsee waneekiya, atitaateesinaya, itaru zurumari waanasincha nda wanasir taarash taaksin, tputsee nda tatsamooru chinakshinllinaya.

¹⁸Tputs wanasirimash taárshee wanasirimshee kasakchusin, mantsirimashsha yusur chinakchusin, waanaamandari charinari tsipachinllinaya. ¹⁹Yutaritshishpan tputs yuw mantsir taakana anoo kasayarusin, yusursha wanasirsha taakchusin, tputsee wanasir tatsamooru chinakchusin, anumand wanasir kis taachinllinaya.

²⁰Siy tsiyatkus, tayus, tayus ashiksa; ¿Apanll iyaa wanasiree chinak? Mangu tputsee waneekiya, ántangat ashiksa.

Yuwamand átis, misha mantsir patatki anumand minamtawaatsiritis Israelchicheetsis wanichintspa,^b Apanll tárangiya.

Ashiriya, kamaneena yuwaa Apanll chiyaa tputseetsich taarashich yasaku anootsi.

Israelchich kurak tiptsiree mantsir ksutarangana anoo kamanchintspa

34 ¹Apanll nuwaa Esekiyelaatsi tárangiya. ²Esekiyela, nutsish musásimashtaati, ashiritaa nuwaa kuki Israelchichee kurak kamanishini. Ashiri tángcha. Paptsa. Apanll siyaa kurakaatsis waneerunts. Siy Israelchichee wanasir ksutangtsa. Opeeja ksutamapan tamatarparee shingtsa. Itaru, siy nda ashkus saanaatstamari ksutaksa. ³Nduntaa opeeja siy ksutkus, itaru mimireetsimsha kis waaksa. Mishat, purootstam kamareemis k'tayarus, kamartaksa. Yuwaatssha yungantataru anoo pachaksa. ⁴Ashki-taatis, nda yuwaa opeej wanguytaku anoo nda yaramaam zandaksa. Mishat, yuwaatstam kuchakharu anoo nda irimiypa puntayarus yaraksa. Mishat, yuwaa suwakana anungaz nda nachungayarus, yamayarus waashtam watandpunush wayaksa. Itaru, siyaa opeejareetsis mangu kiyung yachaksa, nuw siyaa ksutamapaneetsis atina. ⁵Ashiri nuw tputsiri opeej tamapari ashiriya. Kurak nuwaa tputsiri nda ksutkusin, opeeja ksutamapan ndunar, yapsha waritaku ambsha masatumbachusin, tumuzsha anoo katungtariya, nuw tputsiri ashikpaz ashkanaya.^a ⁶Ashiriya, opeej manginap, misha machpitam suwasuwarangana, anungaz ¿chakshtaja nayaniku nachungayach? watam tputs anoo ksutamapan ndunariwa.

⁷Ashiri na ksutamapanis nuwaa kuki kaapaniri mazinangtsa. ⁸Nuw Apanlli Taarashipani zurampatari siyaa ksutamapaneetsis atina. Ngichkinaareena, tsipatspatari tuwapchima. Siy nda tputsireetsi wanasir ksutkus, saanaatstamari ksuta-

^b 33.20 Matiwa 16.27; Romshucheema 2.6 tsiyatsis nipta tatsamooru taaritamta.

^a 34.5 Matiwa 9.36; Márkosa 6.34 tsiyatsis nipta tatsamooru taaritamta.

rangus, nuw tputsiri opeej tamatarpari ashirusin masatambarangusin, siy nda nachungakus, tumuzeewsha anoo zayarusin katungaranganaya. ⁹ Ashirucha, nuw Taarashipani siyaa ksutamapaneetsis atashina. Yuwaa nuw tsiyatkachichiri anoo kaapaniri mazinangtsa. ¹⁰ Nuw Apanlli Taarashipani siyaa atina. Nuw siyaa kundartaktana, watam tputsireetsi istamaam nda zandaksawa. Nuwaa tputsiri ¿tamareeja ksutarangis? anoo mashchintspa. Ashiri yuwaa ashirangis anoo yasayaruri, siyaa tashitungakchuri, ndusha nuwaa tputsiri ksutatssa. Watam nda wanasir ksutkus, kiyung yachaksawa. Ashkachuri, nuwaa-nasha tputsireetsi ksutchima, Apanll átcha, nuw Esekiyeli siyaa atina.

¹¹ Apanll Taarashipani átcha. Nuwaa-nasha tputsireetsi ksutkuri taachima.

¹² Ksutamapan wanasirimish opejarini tsípakchu, anungaz urutari nachungtaru, nuwsha ashiritam tputsiri tsípachusin, anungaz uru nachungakuri taachima. Ashiri masatkatssin, tapishpaz ashiru kiyung kachiychachinllina. Anoo uru tapachindachima. ¹³ Minupsha tsap naatambarangana, anoo yamayaruri, yusur waanshutam watsapun wayachima. Sheeruri, Israelap mach machima. Mishat, wazawipitam kungup machima. Ichingaruru yakat yámandachima. ¹⁴ Anush wanasirsha katungats katungchinllinaya. Sheersin, Israelamun mach taachinllinaya. Anush nuwaana katungtsee panakuri, katungkusin, anshurisha kanuskusin taachinllinaya. ¹⁵ Nuwaantari opeejaa ksutamapan ashiruri, ksutkuri taachina. Ashkuri, tputsiri nizichinllina, anoo wanasirsha wayakchuri, uru kanuschinllinaya, nuw Apanll Taarashipani atina. ¹⁶ Tputsireetsi nuwaana wanasir ksutchima. Ksutamapan wanasir opejarineetsi ksutaru ashtachima. Tputsiri masatkatssin nuwaa-nasha anungaz uru nachungayaruri,^b yusur anshutam wayachima. Wandtaati

wats chpamawsha yamayachuri, nuwaa-nasha anoo tapatstashipa tapatstayaruri, uru yarchima. Nuw wanguyawaa, misha matamsheetam, wanuts kapunguwaats-tam tatsamooru ksutchima.

¹⁷ Nuw Apanlli Taarashipani siyaa atina; mazinangtsa. Ashpatamtis opeej tamapari ashirus taaksa. Itaru, ashpatamtis kaapar tamapari ashirus taaksa. Opeejaa, misha kaaparaatstam tatsamooru nuw wanichima.^c ¹⁸ Ashpatamtis pastoo wanasirimshee kis katungeerus, tazazarus, anootstam pastoo ktsiptis tayutaritamaam kapchaksa. Wakunguree wiree kis waayarus, itaru anootstam kapchayarus kasaksa.

¹⁹ Ashiriya, yuwaa pastoo siy kapcharangis anoo nuwsha opejari nda kis katungkanaya. Yuwaatssha kungoo kaptsayarus, shshutaramchu kasarangis, anootstam nduntam kis waakanaya. ²⁰ Ashirucha, nuw Apanlli Taarashipani atina. Opeej yungatataru an xangitamaa kiyung yachaksin, nuw tatsamooru yasayaruri, wanichima, atina. ²¹ Siy matamsheewis wizpureerus wanguyawaa kitsiptis kayungambayarus, tununeerus tuzanganiksa. Ashkus, suwasuwakanaya. ²² Itaru, ashkitaatis, nuwaa-nasha kiyung kachiychkana anoo tapachindachima.

Antaati anoo opejareetsi shuchichtarusin, taamaam zandkeezi. Nuwaana opejareetsi tatsamooru wanasir wayachima.

²³ Dapiyaa nuwaanaatsi tputsiri amb zanganchima. Uwsha anush ksutamapan taachiya.^d An kizpurcha wanasiri. Uwaatssin ksutku taachiya. ²⁴ Nuwaa Apanlleetsi Apanllirineem inachinllinaya. Tputsireetsshi Dapiyaa urkareem inachinllinaya, nuw Apanlli atina. ²⁵ Ashiri nuwsha Israelchichpa tputs wanasir tatsuyakchuri, kishsha taachinllinaya. Kpachamsheetssha arap zanganchima. Tputsiri mapiyshtisin kis taaksin, mzatsish, misha manginshutam kis maachinllinaya.

²⁶ Nuw tputsireetsi nuwaanshu pangitipuranllizee machish wayachima.

^b 34.16 Lukasa 15.4-7 tsiyatsis nipta tatsamooru taaritamta. ^c 34.17 Matiwa 25.31-34 tsiyatsis nipta tatsamooru taaritamta. ^d 34.23 Wanga 10; Apanll wanichu anu 7.17 tsiyatsis nipta tatsamooru taaritamta.


Nuwaana istakuri sinaatssha zangan-kachuri, yuwash waritakchu anush sin sinaku taachiya. ²⁷Tatsumarini wanasir mazarish yusiychiya. Tsap tatsumaam wanasir yanungaku, zapan yusiyku, anoo pusaksin, waanshu watsapun taa-chinllinaya. Tputsireetsi wanasirsha wayakchuri, yuw tputsireetsi kiyung yachaksin, tumuchchurtarangana, anshtisin tputs nuwaa naatstakchusin, in Apanll Taarashipancha, táchinllinaya. ²⁸Arapcheewtam tputs ndusha tputsireetsi kiyung yachaksin taachinllinaya. Mishat, manginshuchtam kázamish ndusha zayaru katungku, uru kisha taaksin, nda punichinllinaya. ²⁹Anuw nuw tsap wanasir wayakchuri, zapan tatsumari-neetsi pusachinllinaya. Ashkusin, ndusha marizimum kiyung kachiychinllinaya. Mishat, nduntam tputs waatsin tayutaritkusin, michitchinlliniya. ³⁰Anu-mun tputs nuwaa yasachinllinaya, nuw Apanlleeruri tputsiripti taaki anootsi. Nuw Israelchichee tputsirtana. Nuw zurampatari atina. ³¹Nuw tputsireetsi opeej tamapari ashiruri siyaa ksutchi-ma. Siyaa nuwaa apartana taatssa, nuw Apanlli Taarashipani siyaa atina, Apanll siyaa Israelchicheetsis átcha, nuw Esekiiyeli atina.

Ashiriya, kamaneena yuwaa Israelchich kurak tiptsiree mantsir ksutarangsin, itaru Apanllsha waana wanasir ksutchu anootsi.

Israelchich yusur watsapunish kis taakchusin, anush tputs ichingarusin Apanlle yasachinllina anoo kamankiya

36 ²²Ashiri shiy Esekiyelaa, Israelchichee tángcha. Yuw nuw ashkachi an nda saanamuntari ashtatssa. Itaru, nuwaanamuntari wanasirimshiri ashtachima. Siy nuwaa yutaritaam ínarangitaatis, ashiritaa siyaa tapachindachintspa. ²³Arapchish tputs taarangus, nuwaa yutaritaam ínarangitaateesa, ashiritaa nuwsha nuwaanaatsi wizpuriri uru

tuyamandachima. Ashkachuri, tputssha nuwaa Apanlleetsi yasachinlliniya. Watam nuw Taarashipani atinawa. ²⁴Nuw siyaa minush tsap taaris anoo tashitungayaruri, washunandsha tushaniyaruri, saanpeetarisha tsapunish machintsa. ²⁵Mishat, siy yutarishishee chinarangus, apanllputsirimunis mangis taturangus, mangleetsis taminllurtarangis, anoo nuwsha kungu-papaz ashiru kupachintspa. ²⁶Sheeruri, siyash mangishis kaneetsi pshtakchuri, siyaam taarashish kaneesichsha panakchuri, mangis yutaritaatstaa patumbich tamapari ashiru mbamaatstaa, nuwsha tachingachuri, mangleetsis wanasirsha kasachintspa. Ashkachuri, siyaa nuwaatsimarisha kuki payukus taatssa. ²⁷Siyash kaneetsi tapshtukchuri, siy nuwaatsimari-sha kuki payukus, nuwaa kamachtamari izuurasha tuminkus taatssa. ^a²⁸Ashiri



Sirútari Apanlle kuk yandarangusin, kira-kamun turimeero ashishtaranaya. (36.27)

yuwaa nuw siyaam zitaminaris tsapoo panarangi anshuritam taakchus, nuw siyaa tputsireemi ínakchuri, siyaa nuwaa Apanllireemis ínatssa. ²⁹Yutaritash taarus, kiyung kachiukus taarangis, anoo nuwsha tapachindachuri, kisha taakus, mzarshis tatsumaris tirik zapan kayanaku, anoo katungkus, ndusha marizimum

^a 36.27 Romshucheema 8.5-6; Gálatasscheema 5.22-25; 1 Wanga 3.24 tsiyatsis nipta tatsamooru taaritama.

kiyung kachiykus, wanasirsha kis taatssa. ³⁰Mishat, tatsumaris zapan yusimaam mzarshis wayachima. Ndusha katungats siyaam pshataku, nda siy arapchee tputs pazitssa. ³¹Amb ashkachuri, mangeetsis p'tseekchuri, yuwaa mantsir taarus, zapan yutari ashirangis, anoo chinakchus, saanamand yutarishishiris pazitssa. ³²Nuw Apanlli siyaa Israelchicheetsis táchintspa. Kaapaniri mangoonangtsa. ¿Antaati siy wanasir taakis, anumand nuw siyaa istachee? Nda. Anumand kizpur pazikus, mangis mantsakus taangtsa.

³³Apanlleeruri siyaa atashina. Nuw siyaa yutaritshishiris tachingachuri, mapiyshitis saanshutarisha tsapunis taatssa. Yaktaris kapeetampaz ashiritaa taarangu, anoo yusur wanasir yaratssa. ³⁴Tsapuneetsis kasambarangus, yutaritamuntaa anoo yusur puyakchus, tputs amb napkatsin, wanasirsha yaram pangchinllinaya. ³⁵Tputssha anoo tsap, In tsap anuritana kasamunawa. Itaru, natsha Edeng watipuranyl tamapari ashisha taariya. In yakat anuritana izuuru kapitam maachi ndunar taarangtaa, natsha wanasirsha tputs zapan kizpur taaranaya, táchinllinaya. ³⁶Ashiri yaktashuch yuw annungiri watsiri taararutaru, nda tsiparangana, anshitisin nuwaa Apanlleetsi Taarashipaneetsi yasachinllinaya, nuw yakat kapeeta-maatstaa yusur kizpurinasha wanasir wayachi anootsi. Mishat, yuwaa maza-reem wanasiritam wayachitamti anoottam yasachinllinaya. Nuw Apanlli Taarashipani uru amb sheeruri kasachima.

³⁷Ashiri nuw atina. Uru siyaa Israelchicheetsis aranginasha istachima. Yuwaa mashkis anoo izuuru tatsamchima. Ashkachuri, opeej wazapan waniptarparee aship tiptsirineem izapanichima. ³⁸Yaktarini izuuru kapeetam, tputs ndunarimuna, anush tputs tatsitachtaya. Irusarinash shambatshishush opeejaa muchimaam yushindakchusin, zapan tatsitangat ashtar, ashiritam tputssha Irusarinush tatsitchiya. Ashkachi anush, nuwaa Apanlleetsi natstachinllinaya, tángcha, Apanll nuwaa Esekiyelaatsi tárangiya.

Ashiriya, kamaneena yuwaa Israelchich yusur watsapunish kis taakchusin, anush tputs ichingarusin Apanlee yasa-chinllina anootsi.

Na kamanchintspa yuwaa Apanll Israelchichee yusur napuz tamapari ashirusin, kiyung kachiykana anoo ituyamayaru, waanshutam watsapun wayachu anootsi

37 ¹Apanll Taarashipan nuwaa putayaru, wizpurpa machtarangiya. Watandsap yuwash wanap xanaru anush nuwaa yushindarangiya. ²Anushsha watandsash nuwaa machichtara iturpitarashirangiya. Yuwash wanap puzanandari xanaru anush, ashirangiya. ³Sheeru, nuwaatssha tárangiya. Shiy ¿amaksha? ¿In wanap yusur támecheeja? nuw shiyaa atina, tárangu, nuwsha, Apaa Taarashipanee, shaanacha nee yasatasha, tárangina.

⁴Ashiri Apanllsha nuwaa, Nuwamun suri tsiyatkush, Wanapoo, ichingaruschizayarus, Apanlee kuk mazingangtsa, tángcha. ⁵Apanll Taarashipan siyaa ateeja. Nuw siyaa ituyamayaruri, yusur taarashie pangatssa. ⁶Yanxeemtamtis wayakchuri, nutsis nutseenkachus, taseritamti taachiya. Sheeruri, siyash yusur tapuseeruri, sitarnasush taatssa. Ashkachuri, uwshtisin nuwaa Apanlleetsi Taarashipaneetsi yasachinllinaya, Apanll átcha tángcha, tárangiya. ⁷Ashiri nuwsha anuritam tsiyataranguri, kizpur zunganeerangu anoo mazarangina. Muntaz kizpur muntazaranguru, tsiparsha wanap yuw piyamaw tamutamuru ansha washunand ptsutaranaganaya. ⁸Anootssha wanapoo nap ashkuri, wayanxaam, misha nutsaseemtam kinarangiya. Ashirangu, anumun iwaz zapsha túmartarangiya. Itaru, nda kchitamuna.

⁹Ashiri Apanllsha Taarashipan nuwaa tárangiya. Anoo tsiparee wan sur kuru-zungi, tsipar yusur kchitamaama. Ashiri tángcha. Tsipareewis wanis naanints. Yap tsapurunas tsparkatu taaris ambchiwis ichingarush naanints. Kuseerus, tsiparish pshungints, in tsipar wanap yusur kchitamaama, tángcha, Apanll táranguru,

¹⁰ nuwsha anuritm tsiyataranguri, ansha tputs wan tsiparish pshturangusin, waanapsha yusur kchitaranganaya.^a Ashpar-tarishtisin tsipar támandarangsín, ashíp sundar wazapan shaniyaranganaya.

¹¹ Anootssha Apanll nuwaa tárangiya. Israelchichin in napuz tamaparee ashirusin taaksin, in napurini izuuru puzama. Ashirucha, Chinashini nduneeru, masatanga ashkiniya, atanaya. ¹² Ashiri shiysha nuwaa kuki kamaningcha, Apanll siyaa átcha tángcha. Nuw Israelchichee tsipar ashirusin, mapshishush taarana, anoo tashitungayaruri, yusur watsapunip-tam wayachima, átcha Apanlli, tángcha. ¹³⁻¹⁴ Nuw siyaa mapshishishpaz taarus ashiris anoo tashitungachintspa. Ashiri nuw siyaa taarashis ituyamakpaz sheeruri, tsapunshis wayachintspa. Ashkachuri, anush siy nuwaa Apanlleetsi yasatssa. Nuw yuwaa tsiyatki anoo uru tatsamchina, nuw siyaa Apanlli atina, Apanll siyaa Israelchicheetsi átcha, nuw Esekiyeli siyaa atina.

Ashiriya, kamaneena yuwaa Apanll Israelchichee yusur napuz tamapari ashirusin, kiyung kachiykana anoo ituyamayaru, waanshutam watsapun wayachu anootsi.

**Israelchich Utaáchhipa
washunand minumtashumarisha
taachinllina anoo kamankiya**

¹⁵ Apanll nuwaa yusur tárangiya.

¹⁶ Apaya yasina. Nimun yandangi, Utaáchich Israelpa amikurtayanllina anootsi, tárangu, anumunsha yusur, Apaya misha yasina. Nimun Osiyarinchich Israelshuchpatatam amikurtayanllina anoo yandangtamcha. ¹⁷ Sheerush, yasináa washunandarisha minumarisha kinamaam kpatstayarush ksangcha. ¹⁸ Wanda-ya Utaáchich anoo mashkatssin, ¿In maya áta? kamaninda, ateesinaya ashiru, ¹⁹ shiysha nee Apanll átcha tángcha. Utaáchich Israelchichpa washunandari-sha yapandarsin taachinlliniya, Apanll

átcha, tángcha. ²⁰ Táyarush, anootsiri yandamaa payupayucha, wani yuwaa yandarangish anoo pangpana. ²¹ Ashiramchush, anumunsha tángcha. Apanll siyaa ateeja. Siy minup tsap naatambarus taakis, anoo tashitungayaruri, washunand tushaneeyaruri, tsapunpitamtis wayachintspa. ²² Ashkachuri, washunandarisha Israelshuchpat wayachintspa. Anush minumarisha kurak taakchu, ndusha chawpishtambarus taatssa. ²³ Mishat, ndutam apanllputsireetsis mantsirimshee ungirtakus, arangeem ndusha minu yutaritshish chinakus taatssa. Nuw yuwaa yutari zapan ashirangis, anoo izuuru tachikchima. Ashkachuri, tputsireemi siyaa ínchima. Siyaa nuwaa Apanllireemis ínatssa. ²⁴ Dapiyarinchicheetssha tputsireetsi kurakareemis ínatssa. Ansha ichingurootsis ksutku, siyaa nuwaa kuki izuuru payukus, kamachtamareetsi tumi-nutssa. ²⁵ Nuwash tputsiri Akoparinshini watsapun taatssa. Yuwashtam zitaminaris taarangu anshutamtaya. Taakus, ichingarus iparis, chinllinitamtis izapaneerus, urutamari taatssa. Anush nuw tputsiri Dapiyarinchich nlluranur urutamaritam kurak taachiya. ²⁶ Ashiri Israelchicheetsis tatsuyakchuri, wanasirsha taatssa. Yuw ashkachi an urutamari taamaama ashtachima. Mishat, tputsireemtamtis izapaneekchuri, anush pangeemi wanasirimshee wayachima. Ashkachuri, an urutamari taachiya. ²⁷ Anush nuw taakuri, nuwaa Apanllireemis ínatssa. Nuwsha siyaa tputsireemi ínachintspa.^b ²⁸ Ashiri nuw pangí anush urutamari taaku, tputs-tisin nuwaa Apanlleetsi yasachinllinaya, Apanll átcha siyaa Israelchicheetsis, nuw Esekiyeli siyaa atina.

Ashiriya, kamaneena yuwaa Israelchich Utaáchchhipa washunand minumtashumarisha taachinllina anootsi.

[Ashiri wappari. Watamaricha nuw Esekiyeli kuki.]

^a 37.10 Apanll wanichu anu 11.11 tsiyatsis nipta tatsamooru taaritama. ^b 37.27 Yuwaa nish átu anootstam 2 Koríndshucheema 6.16 tayusima kamankiya. Itaru, Apanll wanichu anu 21.3 tsiyatsis nipta tatsamooru taaritama.